

A MÊ MARI

Done mari,

cheste volte mi è saltade la moscje di dâus il «bon an» su pal sfuej: no s'è veis purnò par mâl! E us al doi cun dut il cûr e l'afiet di un fî che nol è plui un frut e ch'al s'impense e al sa misurâ dut ce ch'al a vût di Vô.

No mi veis dadis lis comoditâz e i contenz dai siôrs ne i sfijotèz des miezis veladis, ne il velen e la grinte dai pùars invidiôs e bogndi nuje. Mi veis tirât-sù cence fotis: cence sberlis e cence caprizzis; mi veis fat diventâ un omp ch'al sa lâ pe sô strade e un furlan che nol bastarde la sô razze. Di dut chest us varai agrât fintremai ch'ò varai flât.

E us ài agrât ancje di tantis robutis che putros di lôr no san avonde stimâ: di vêmi metût non Meni e no Lidio o Melampo, di vêmi insegnât a fevelâ par furlan e no par slimi, di vêmi nudrît in libertât e no sot une cjampane di veri, di vêmi industriât a lavorâ e no a fâ il bulat, di vêmi lassât cressi pitost ruspi che no lecât, di vêmi usât a cjalâ i faz e no lis peraulis a cjalâmi denant e no a cjaminâ a uarp. E nol conte nuje se qualchi volte 'o sponz, se 'o trussi, se o pescj la code a cui che la strissine, se 'o doi di comedon a cui ch'al cîr di intardâmi o di imbolognâmi o di imbussulâmi: al conte une vore ch'ò vebi cjapade une dreture, une sgrimie, une volontât di cori su lis sinis dal just e dal vêr; al conte une vore che nissun vebi ancjemò podût comprâmi a bon presit, ne fâmi mudâ gabane, ne cjapâmi in cjastine, ne butâmi in ghigne une carognarie.

Di' lu ueli che mi basti simpri la fuarze di vivi come che Vô mi veis instradât: parcé che qualchi volte si sclope, cun tante morcje ch'è ven tal pîs...

Cumò 'o ài une sole brame e une sole ambizion: chê di rivâ adore di fâ cu la mê canae ce ch'ò veis savût fâ Vô cun me e cun miei fradis. Par intant no mi lementi; ma il gno grandat mi pâr ch'al si lasse un pôc sglonfâ i budiei di peraulonis e di bufulis. 'E sarâ la scuele, 'e sarâ la clime stonfade di comèdiis che il siroc nus mene sù; ma des caloradis Vô mi guarivis cun tune purghe, e il fî di gno pari al intint fâ compagn.

Bon an, done mari: in salût e, Diu ueli, in sante pês. 'O vignarai a cjatâus plui dispes ch'ò podarai, che ogni volte ch'ò mi gjavi di chest cjalderon di zitât, mi pâr di ricreâmi e tornâ gnûf.

A riviodisi in curt.

(Patrie dal Friûl – 1950)